

Parare Domino Plebem Perfectam

A lokisetse Morena Sechaba se phethehileng (Luka 1,17)

# Moeletsi oa Basotho

www.moeletsoabasotho.co.ls

Matekane o re menyako e butsoe



5

Bophelo ba sechaba bo tlokotsing

6



CBL e khutlisetsa sechabeng

7




# LHDA E TŠOEROE MATSOHO

3

www.moeletsoabasotho.co.ls

Moeletsi oa Basotho



Re se re fumaneha ho marangrang

Email: newsroom@moeletsoabasotho.co.ls  
Tel: +266 28350466/ WhatsApp: 62600983

# MOELETSI

# Baahi ba ntša mabinabine

## Tlala e ka u kenya ha lelimo

Kannete-nete Lesotho le otluoe ke tlala hoo le ka ithekisang ka theko e tlaase hakaalo machabeng? Ehliile ho so le hobe haeba re bua phatlalatsa hore re itšitelo ka lebaka la ho qekisa ho khaketsoa. Re se re phelela ho ja ha re sa re letho ka bokamoso ba naha, ba bana, litlohola le litlohola tsa rona. Basotho ba ne ba opile khomo lenaka ha ba re, "bofutsana bo jesa ntja," hobane ke mona re furalla mekhoha le meetlo ea rona re hapa tsa lichaba tse ling ka lebaka la mphe-mphe.

Batho bana ba re thetsitse ba re ba re fa tokollo, re se re ka ipusa re le bang ntle le bona. 'Nete e teng ke hore ha ho ntho e joalo, hobane ba re siile le lintho tsa bona. Tse hlohang hore re boele ho bona ho tseba hore na re li sebelisa joang, ho li nchafatsa ho re hloka ho ikopanya le bona. Ba kentse ka lihloohong tsa rona hore bophelo bo nepahetseng ke boo ba re sietseng bona. Ka hona re se re phela ba mose ho maoatle re le Afrika.

Ke mona moo ha re lokela ho ntšetsapele bophelo ka ho intlafatsa; ho aha lipetlele, ho lema khahlanong le maemo a phetoho ea leholimo re tl'o khaketsoa hobane le tsona lihlo-liloeng tsa rona li laoloa ke bona. Re fetohile mekopakopa kahar'a naha ea habo rona. Lichaba li ikhantša ka seo ba nang le sona empa rona re fetohile mafutsana ka ho rekisa matlotlo a rona.

Manyesemane a kentse bonngoe likelellong tsa rona, 'me seo se ba thusitse ho re arola hobane ha ba hloka ntho e et-sahale ba ipuela le motho a le mong ebe eena o shebana le mpa ea hae qha! Ha ho sa na ntho eane ea hore kopano ke matla, motho a ke ke a robala a jele ebe moahisane oa hae o bolaoa ke tlala le bana ba hae. Bana ba motho ha ba sa arolelana hlooaana ea tsie ho hang, matsatsing ana lekanyane ho so phela le liretse. Basotho e-ea kae baneng?

Morero oa Metsi a Lihlaba tsa Lesotho (LHDA) ke ntho ea khale haholo, hoo ho sa lokeleng ebe ho ntso ho e-na le liqhobeshoane kapa lingongoreho tsa sechaba mabapi le tšebeliso 'moho. Morero o shebahala o sa phethahetse litšepiso tseo o li entseng sechabeng. O fetohile morui oa tsona mofutsana oa liphethahatso. Ka bomalimabe ba ikarabellang ho ona ba supa ha le bona e le bahlanka feela ba sebeletsang monga bona. Ka hona ha ba sa fuoe chelete e phethahatsang merero le meralo ea bona ha ho seo ba ka se etsang. Ba re chelete eona ba e etsa le hona e ngata, empa joale ba tšeroe matsoho ho phetha boikarabello ba bona sechabeng.

Batho ba ile ba fallisoa ba tlosoa mahaeng a bona ho isoa libakeng tse fapakaneng, 'me tebello e ne e le hore morero o tla nka boikarabello, ho bona hore ba phetse hantle, e se feela ka ho ba fa chelete. Morena ke eo o seboko ka hore ba fihla ba behoa feela ba sa kopanngoe le sechaba e le ho aha likamano tse mofuthu. Batho bana ba ntse ba e-na le khatello ea maikutlo ea ho tloha lehaeng leo ba phetseng ho lona nako e telele. Ba hloka tlhokomelo le katamelo e ikhethileng, ba hloka tšehetso e matla haholo.

Nakong ena ea liphomolo tsa Paseka re le lakaletsa khotso le lerato, arolelanang mofuthu le lerato malapeng a lona. Fetisetsang makhabane ao ohle ho baahisane ba lona e le hore khotso e rene kahar'a sechaba sa Morena Moshoesheo I joalokaha e ne e le khaitsetse ea khotso. Ha re eeng likere-keng joaloka Bakriste, 'me re hopole ho beha mererong ea rona ketekelo ena ea lilemo tse 200 sechaba sa batho se thehiloe. Re kope Morena ka grasia ea hae ho re thusa ho phela ka moo Eena a ratang kateng e le hore qetellong re kene Letlotlong la Hae le sa feleng.

### Nthabeleng Seithheko

**S**echaba se Sangoeng ke Morero oa Metsi a Lihlaba (LHDA) libakeng tse fapakaneng, se re Morero o lokela ho tšoara lipuisano le batho ba joalo khafetsa molemong oa ponaletso ea tšebetso, moo baahi ba neng ba teka lingongoreho tsa bona ka tšebetso ea Morero. Tsena li hlaleletse 'mokeng oa la 26 Tlhakubele monongoaha.

Nkhono 'Maseiso Theko, Morena oa Metolong ea amohetseng baahi ba Ha Mohale le ba angoeng ke morero o re liqholotso tsa bafallisua, ke ho se fuoe tlhabollo e lekaneng pele ba fetola sebaka ho ea moo ba il'o phela teng le lithupelo tse fokolang tse fumantšoang baamoheli le bafallisoa ba le 'moho.

A re ho na le khaello ea ho bua le bafallisua ba le bang, hape Morero ha o lokisetse sechaba ho baballa lintho tseo o ba fang tsona.

A re morero o lebala bacha, ha ba thusoe ho kenella likopanong tse ntlafatsang bophelo. O re morero ha o lokise likelello tsa baamoheli ho batho ba fallisitsoeng, leha ho le joalo, o fane ka lithupe-lo litabeng tsa boipheliso, lithuto le litataiso tabeng ea temo ea litholoana le ea masimong.

A re LHDA e kenelle metseng le metsaneng eo bafalli ba amohetsoeng ho eona, ho aha setsoalle.

Morena oa Ha Mohale, o re sechaba sa habo se seputsoa ke tlala le tlhobolo e bakiloeng ke LHDA kaha chelete e ile ea ba ngata nakong ea khaho ea letamo, empa ha joale ha ho na letho. O re ha joale ba hula ka lithako tsa morao moruong, batho ba nang le masimo a khale ha ba e-s'o lefshoe.

O re ha ba e-s'o tsebe ba sebelisitse chelete ea lintlafatso, ba makalla ha ho thoe ba ahile matlo a mapolesa le makhotla ebile e se tlhoko. O re ba khotaletsa LHDA ho koetlisa bacha hore mesebetsi e be teng kaha bohahlauli bo le bongata, ha ba re Morero o ba khaketse empa ba bitse batseteli hore khoebo e tsebe ho ba teng.

Mosiuoa Sekhantši ho hlaha Muela, o re More-ro o amme tikoloho ea 'muela, bana ba hlalileng Letamo la 'Muela le ntse le ahoa ba se bile ba na le malapa empa litletlebo ha li e-s'o fele. O bontša hore o boetse o amme lihloiloeng, masimo, makhulo, malapa le masaka a bona. O re o sebelitse le ho fana ka lithupe-lo, empa ha ba tlameha ho bona hore ea sebetso, merero ea oela hobane e isitsoe ho 'muso.

A re ba ikhapela lichelete tsa sechaba tseo ba neng ba li bokeletse ka likoporasi, le hoja ho ne ho e-na le tumellano e ileng ea etsoa. O re hape ba sentse lipompo tsa letšolo la iketsetse.

Morena Mofula Tšosane ho tsoa Ha Katse, o re ba amehile ke Morero kaha ba se ba se na lihloiloeng, 'me ha joale ba khutlisitse makhulo. O re metse e noesetsang letamo ka metsi e lebahlele ha ba etsetsoe lintlafatso joaloka motlakase.

Mookamelii oa Boto ea LHDA Stephen Phakisi, o re hore ebe ba atleha ho fihlela merero e meng ba lula ba tsoepeleloa ha ba na chelete, le hoja ba e etsa e le ngata ha se ea bona. O re moo ba ileng ba ba tšepisa ba sitoa ho phethahatsa ba ba ut-

loele bohloko kaha ba se na chelete. Ka lebaka la boithuto bo boholo boo Morero o bileng le bona, ba se ba tl'o ntlafatsa mokhoa oo ba neng ba qala mosebetsi ka ona.

O re ba lekile moo ba lekileng ka phano ea metsi 'me ba tl'o etsa mekutu, ka hona selemo sa 2024 se tla fela Mokhotlong e se na bothata ba ho khaoheleloa ke motlakase, hape batho ba lokela ho iketela mesebetsi. A re ha ho bonolo ho sebetsoa litaba tsa sechaba, ka hoo ba tla khoptjoa ba ntse ba ea pele.

Lebitsong la Naha ea Afrika Boroa Teboho Nkhahle oa Lesotho Highlands Water Commission (LHWC), o re mesebetsi oa bona ke ho bona mahlo le litsebe tsa ba pusong ea Lesotho le Afrika Boroa, ka hoo ba tl'o shebana le mathata le ho tlaheha hore ho ntse ho sebetsoa joang. A re ba tloha 'mokeng ona ba tseba hore lithoko tsa batho ba angoeng ke More-ro ke life, 'me litletlebo li se ke tsa lumelloa ho ama likamano tsa sechaba.

A re b'a elelloa hore ho na le moo ba ba hatileng litorong, ka hona o re litsela tse kenellang kahar'a metse, tšubuhlellano, botsitso ba kelello le hore batho ba il'o phela bophelo boo ba sa bo tloaelang e lokela ho ba pale ea maobane. A re tšebeliso e mpe ea lichelete esale e le teng, e tlameha ho sebetsoa ka matla.

Letona la Lihloiloeng Mohlompehi Mohlomi Moleko, o re o batla ho bona selemong sena se holimo sechaba se lefshoa matšeliso a sona a M400million, hape ba bone hore Oxbow le eona ea ahoa ka phehlo ea motlakase. A tsoelapele hore mekonteraka e ntlafatse libaka tseo ba sebetsoang ho tsona, le sechaba se lule se fuoa lintlha khafetsa.

Sechaba se bileng teng 'mokeng ona ke sa Ha Mohale, Muela, Polihali le Ha Katse.

Contacts: +266 28350 466 / 6260 0983 (Whats app)  
Email: moeletsioabasotho@gmail.com

**MOELETSI** **oa** **BASOTHO**  
A LOKIBETSE MORENA SECHABA SE PHETHEHILENG (LUKE 1:17)

### Editorial

Lesoetsa Rakubutu (Editor)  
(+266) 58490670 / 62031949  
editor@moeletsioabasotho.co.ls

Lehlohonolo Mohale (Sub-editor)  
(+266) 58 771 507 / 62 771 507  
subeditor@moeletsioabasotho.co.ls

### Advertising

Thabo Lesaona  
(+266) 28 350 466/ sales@moeletsioabasotho.co.ls

### Newsroom

Nthabeleng Seithheko 57 665 038/ 68 216 721  
nthabeleng.seithheko@moeletsioabasotho.co.ls

Tšelisio Thakholi (Sports) 58 540 853/ 62720730  
tseliso.thakholi@moeletsioabasotho.co.ls

newsroom@moeletsioabasotho.co.ls

### Production Desk

'Mateele Liqa, Sr. Canicia Nthunya

# LHDA e tšoeroe matsoho

## Nthabeleng Seithheko

**M**ookameli oa Morero oa Met-si a Lihlaba (LHDA) Tente Tente, o re LHDA ka nako e telele e tobane le qholotso ea lichelete, ho tloha ka selemo sa 2016 esale ba sa fumane chelete e ba thusang ho fihlela merero ea bona, 'me sena se entse hore ba chechele morao. O boletse tsena, ha thakhola moralo oa lilemo tse 10, oo LHDA e tlo sebetse e ipapititse le ona, ka la 27 Tlhakubele monongoaha.

A re kahar'a tumellano ea linaha tsena tse peli, morero ke ho boloka khotso le ho ntlafatsa bophelo ba sechaba.

A re toro ea bona e le ea lilemo tse 10 ke hore LHDA e atlehe ho iketsetsa chelete e le hore e thuso ho nyolla moruo ka pokello ea metsi le phehlo ea motlakase lipakeng tsa linaha tsena.

A re ba batla metsi le motlakase tse anelang batho bohle, ho ntlafatsa tikoloho le ho khutlisa boieane ba tlholeho, ntlafatso ea bophelo ba sechaba sa Lesotho le Afrika Boroa, ho bula menyetla ea khoebisano lipakeng tsa linaha tsena le ho bona hore ba ba le ponaleto.

Ha joale ba ntse ba e-na le Letamo la Polihali moo ho tla ba le setsi sa phehlo ea motlakase Oxbow le pokello ea phehlo ea mot-

lakase oa letsatsi, ka hona boikemelo ba phehlo ea motlakase bo tlo phahama kahar'a naha hobane ba tlo etsa motlakase oa letsatsi o tlo hlahisa 739 mhz 'me o tla etsoa ka mekhahlelo ka lilemo tsena tse 10 ha ba filoe lisebelisoa tse hloka-halang.

A re ba ntse ba leka ho ntlafatsa makhulo hore sechaba se tsebe ho ba le libaka tsa phuliso. Ba boetse hape ba sebetse 'moho le Lekala la Thuto le Koetliso ho bona hore batho ba fuoa litsebo le mangolo a ba thusang hore ba fumane mesebetsi, hape ba nka baithuti ba tsoang

likolong nako ea lilemo tse peli hore ba be le litsebo.

O re ho bohlokoa hore LHDA e lumelloe ho bokella lekhetho phehlong ea motlakase. A bontša hape hore ha se litsebi sebakeng sa ho tsamaisa lihotele, ka hoo ba lokela ho sebetse 'moho le bahoebi ba bang. O itse ba batla tikoloho e lokolohileng ntlheng ea bobolu, e le hore ba fihlele liphelelo tsa Machaba.

Mohlomphehi Tona-Kholo o re ka la 22 Tlhakubele monongoaha, o ile a etela khaho ea Letamo la Polihali le tlo thusa bokamosong ba naha, 'me ha Morero oa Bo-

beli o atlehile Naha ea Lesotho e ke ke ea tsoana. O itse morero ona o reretsoe ho fetola bophelo ba sechaba ba linaha tsena tse peli.

A re esale morero o kentse letsoho le matla ntlafatsoeng ea moruo oa naha ho tloha karolong ea pele, le hoja ho bile le mathata kahar'a leeto la bona. A ipiletisa ho LHDA ho bona hore e arabela lillo tsa sechaba le ho li fumanela tharollo kapele. O itse ba batla ho bona ho ahoa setsi sa phehlo ea motlakase sa Oxbow, 'me o tšepa hore moralo oa lilemo tse 10 o tla arabela litlhoko tsa sechaba.

A re ke takatso ea hae hore qetellong ho tle ho hlahlojoe tumellano ea tšebetso lipakeng tsa linaha tsena tse peli. A re tselo ke hore ha Naha ea Lesotho e ntse e fetsetsa metsi naheng ea boahelani, Basotho bohle ba fumane metsi metseng ea bona.

O kopile LHDA ho boloka likamano tsa sechaba le mekonteraka hore khaho e tsebe ho tsoelapele ka katleho. A re mathata ohle a arolang sechaba a se ke a robaletsa a sebetsoe hang, ho bona hore re ba le naha e nang le khotso le sechaba se khotsofetseng



# Melao e fetisoa kamor'a liphuputso

## Nthabeleng Seithheko

**M**ongolisi oa Lekhotla le Phahameng, Adv. 'Mathato Sekoai, o boletse litho tsa Ntlo ea Mahosana hore

setšoantšo sa Molao oa Bojalefa ba se bona marang-rang, ha b'a botsoa letho, ka hoo taba eo ebile semaka ho bona kaha ba sebetse le melao. Tsena li hlahetse puisanong ea hae le Koranta ka la 25 Tlhakubele monongoaha.

O re ho bohlokoa hore e le Makhotla ba batloe mai-

kutlo litabeng tse amanang le molao, hobane liqeto tse ling li etsa hore liofisi li qetelle li kena-kenane.

Ho sa le joalo, Moemeli oa Mokhatlo oa Civic Association of Lesotho, Malimatle Hlalele, o hlalositse hore, joaloka batho ba phelang metseng ea Basotho ha ba e-s'o utloe letho ka

molao ona, o tliisoang ho senya seriti sa bona. O re ho bohlokoa hore Ntlo ea Bakhethoa e sebetse litaba tsa sechaba ka tsela e nang le ponaleto, lerato le ho ikhopola hore Basotho re sechaba se le seng, ka lebaka leo ha se melao eohle e khotsoletsoang ke balichaba e reretsoeng ho thusa naha, empa morero ke ho e senya seriti. O re ha ba na ho lumela hore melao e petlengoe holima sechaba joalokaha ho etsoa.

Morena Peete Lesaona Peete, o itse borena ke bohlokoa, bosebeletsi le bosireletsi ba sechaba, ka hoo o lumela hore thepa ea sechaba hore e bolokehe, ha hoa nepahala hore e be ha ho batloe maikutlo a sona. A re karolo ea bohlokoa ke hore bana ba banana ba je lefa la habo bona. O re melao eohle e lokela ho tšohloa, 'me ebe e arabelang litlhoko le boike-

melo ba sechaba.

E mong oa bacha ba tšoenyehileng, Liteboho Thokoa, o re o seboko ke tsela eo 'muso o fetisang melao ka teng ha ho shebiloe chelete ho sa natsoe litlamorao tse bakoang ke sena. O re khatello ena e tliisoang ke balichaba e kotsi, ka hona e tlameha ho shejoa ka leihlo le nchocho ho ntse ho bolokiloe boleng, seriti le lerato la Basotho.

O re melao e lokelang ho sebetsoa kahar'a naha e mengata, e bang 'muso o ka e sebetse ho tla thusa naha ho ntlafala, joaloka likahlolo tse fuoang balichaba kahar'a naha ena. O khotsoletsa ba pusong ho etsa melao eohle ka sekahla, hore ho be le liphetho tsa-maisong ea naha.

H'a phethela o re ba motlotlo hore maparamente a ka tseba ho sebetse le tlasa khatello, ka lebaka leo o kopa hore ba sebetse melao eohle hore naha e ke e hlomphehe mahlong a balichaba le ho e sireletsa.



# O ipabola ka lepolanka

## Tšeliso Thakholi

**E** mong oa bacha ba bona halang e sa le a boulela le ho rata talenta ea hae ea ho betla lepolanka, ho tloha bonyenyane ba hae e leng Abuti Eric Khothlang, o re qoqela ka moo a sebelisang mpho ena eo a e filoeng ke 'Mopi ho iphelisa ka eona lefatšeng. Maikemisetso a hae ha se feela boipheliso empa ke ho boela a fetola bophelo ba bacha ba bang, ho ba thusa hore kamoso ha khoebo ena ea hae e se e holile le bona ba tle ba fumane mesebetsi. H'a buoa le motlalehi oa Koranta o li behile tjena:

### Bohlokoa ba ho itšoarella ka matsoho

Ho tloha kholong ea ka, haesale ke rata mosebetsi oa matsoho 'me ho betla lepolanka ke ntho eo ke hotseng le eona. Ho tloha ha ke le Sekolong sa Mathomo ke ne ke lula ke rata ho bapala ka mapolanka, ke etsa lintho tse ngata tse bapalang. Ke hona moo litichere tsa ka li ileng tsa hlokomela hore ke rata ho itšoarella ka matsoho. Ha ke le Sekolong se Phahameng sa Maseru Day, ke hona moo joale lerato la ho betla lepolanka le ileng la tota le ho feta.



Ke ile ka chorisa litsebo tsa ka kaha ho ne ho etsoa lithuto tsa ho betla mapolanka. Tichere ea ka e neng e nthuta mosebetsi ona a nthatisa ntho eo ke neng ke se ke ntse ke e rata. Ke ha ke tla qala ho bona hore ho itšoarella ka matsoho ho bohlokoa haholo.

### Lerato la ho qala khoebo

Ha ke qeta Sekolong se Phahameng toro ea ka ebile ho iphelisa ka ho qala khoebo ea ho etsa litulo, litafole le liraka tsa katlung. Ka ea sekolong

sa mesebetsi ea matsoho, se bitsoang Basotho Recruiting Centre se Borokhoaneng, ho ea

etsetsa seo a se hlohang. A nteboha eaba e se e le ha ke qalile.

### Kholo ea khoebo

le machabeng 'me ha e holile bacha ba tla tseba ho fumana mesebetsi e fapakaneng ho latela lit-



leka ho chorisa litsebo tsa ka. Ha ke qeta moo ha eba thata hore nka qala khoebo, kaha ke ne ke se na mokhoa oa ho qala. Ka tlameha o batla mosebetsi pele, 'me ka lehlohonolo ka fumana mosebetsi oa ho rekisa liapole. Ka chelete e nyenyane eo ke ileng ka e fumana ka qala ho ithela khoebo eo e saleng e le ea litoro tsa ka. Motho oa pele eo ke ileng ka mo etsetsa tafole ea katlung ha ke qala ka 2013, o ne a tliile le lisebelisoa tsohle tsa hae, 'me ha ka ea eba motsoho feela, ka ho mo

Ha joale re sebetsa re le babeli empa ke eketsa ka basebetsi ba nakoana ha mosebetsi o le mongata. Re etsa litulo le litafole ka mofuta ea tsona, liotoropo tsa katlung le liraka tsa maboteng. Empa haele liotoropo tsona re li etsa ha motho a entse kopo kaha re e-s'o be le lisebelisoa tse lekaneng.

### Bokamoso ba khoebo

Ke rata ho bona khoebo ena ea ka e hola, e fihlela boemo ba li-furnishara, re hlahisa re bile re rekisa kahare le kantle ho naha. E tsebahale

sebo tsa bona.

### Keletso ho bacha

Bacha khoebo leha e se ntho e bonolo hore motho a ka e qala, haholo h'a se na letho qalang ka se senyenyane seo le nang le sona. Ha ho sa na nako eane ea ho khetha mesebetsi, 'me ho teng qala ka hona. Ha le se le qalile likhoebo tsa lona, tšoarang bareki hantle etsoe moreki h'a fose, moreki ke morena. Bacha ke ka ho itšoarella ka matsoho feela re ka pholosang naha ena maamong ana a nyarosang a tlhokahalo ea mesebetsi.



# Matekane o re menyako e butsoe

## Nthabeleng Seitlheko

**Mohlomphehi Tona-Kholo o tlalehetse Ntlo ea Bakhethoa hore SADC e fihletse qeto ea ho hula masole a ntseng a e hlanaka Naheng ea Mozambique 'mokeng o bileng Zambia. Tsena lihlahetse puong ea hae, ka la 25 Tlhakubele monongoaha.**

O re masole a Lesotho a tla fihla kahar'a naha ka la 15 Phupu monongoaha, ha Naha ea Mozambique e tla iketsetsa lipuisano le linaha tseo e tla rata ho sebetsa le tsona.

O re Naha ea Lesotho e tjametsoe ke bosholu bo phahameng ba liphoofofo le lipolao, 'me 'muso oa habo o ikemiselitse ka matla ho hlola qholotso ena, ka ho rekela Litsi tsohle tsa Tšireletso lisebelisoa ho li

thusa ho fenyha maemo ana a behang bophelo ba Basotho tsietsing, 'me har'a tseling ba ile ba rekela sepolelsa likoloi ho a thusa ho ntlafatsa tšebetso.

A re boema-fofane ha bo maemong a matle, ka hoo 'muso o tla etsa tšebetso ea nakoana ha ba ntse ba ithlaphela ho tsoma mofani, 'me tšebetso eo e tla qala lipakeng tsa khoeli ea 'Mesa monongoaha. A re kaha ba le likojoana li mahetleng ba tla leka ka hohle hore ho be le chebahalo, qetellong ba tla etsa mosebetsi o tsoileng matsoho o khahlisang.

O bontšitse ba ile ba khothaletsa Basotho ho kena temong empa ba amehile ke maemo a phetoho ea leholimo, leha ho le joalo, kaha ba se ba tseba ba tla e hlola joang, bohle ba kene temong e le hore re be naha e ithahisetsang.

O re ba hloka lihoai tsohle li sebetse ka thata, kaha ho na le borakhoebobong ba teng ba tlo theha matlole a tlo thusa ho sireletsa temo hore tlhahiso ha e ameha ke maemo a leholimo se-

hoai se se ke sa lahlehela empa thepa ea sona e sireletsoe.

A bontša 'muso o tsoile sekaneng le motho ea neng a ba rekela lipasa ho mohlahisi oa tsona, kaha a sa sebetse hantle. O re 'muso o se o tla reka lipasa ka bo ona ho mohlahisi ka hona Basotho ba khobe matšoafo, kaha ba hloka hore nako le nako ba fane ka bosebeletsi bo tsoileng matsoho. O bile a ipiletsa ho maparamente hore lichelete tseo ba li abetsoeng ba tsebe ke tsa sechaba li saloe morao li sebelisoa hantle moo ho lokelang.

A re bohanyetsi bo bone hore thepa ea sechaba e-ea moo e lokelang, e sireletsoe le ho boloheha ka linako tsohle. A re Basotho ba tsebe hore lichelete tsa bona li matsohong a nepahetseng, 'me sohle seo ba hloka ho se tseba ba buletsoe menyako.

O lebohile Moetapele oa Bohanyetsi le baetapele bohle ba lipolotiki ka tšebeliso 'moho e ntle eo ba bileng le eona litabeng tsa



sechaba.

Ka lehlakoreng le leng Letona la tsa Lehae, Puso ea Libaka, Borena le Sepolesa Mohlomphehi Lebona Lephema, o hlalositse hore lipolaeano li teng li ngata, empa sepolelsa se leka ka hohle ho bona hore lintho li ba boemong bo bot-

tle. A bontša ha se ile sa abeloa chelete hore se reke likoloi, 'me ho fihlela hona joale ke batho ba 1,634 ba tšeroeng ba ahloloe.

A re ke maikemisetso a 'Muso oa Lesotho ho leka ho tlisa botsitso kahar'a naha ho baballa thepa ea sechaba, le ho bopa khotso.

## Mokhothu le Machesetsa ba supisa 'muso tsela

### Nthabeleng Seitlheko

**Letona la Lichelete le tsoanela ho loma bebebe tšebeliso ea lichelete tsa 'muso ho bona hore chelete e sebelisoa mererong e lokelang, ka tsela**

**e nang le ponaletso. Tsena li boletsoe ke Moetapele oa Bohanyetsi, Mathibeli Mokhothu, ka la 25 Tlhakubele monongoaha.**

O re letona le shebe maano le meralo e ka thusang naha ho tloha boemong bona ba bofuma ho e isa boemong ba naha e thuthuhileng moruong.

A re eo a be le mokokotlo oa ho tataisa le ho soaea Tona-Kholo le matona a hae mohlare ha ba sebelisa lichelete tsa sechaba hampe.

A bontša letona le tlameha ho bolella Lekhotla la Matona 'nete le ho ba thusa ho nepa ha ba etsa meralo ea lichelete, 'me ba etse lintho tse molemong oa sechaba kholo le melao ea naha.

O re Lekhotla la Matona ke letsoho le matla la Motlotlehi, ka hona ba hopole ba tšepetsoe ho ntlafatsa bophelo ba Basotho. A re Letona le tlameha ho tseba maano ohle a makala kaha ba ka fetoloa neng kapa neng, hape nakong eo 'muso o fetisang khakanyo ea lichelete ba tlameha ho tlohela maeto ohle a kantle ho naha, ba bone hore ba sebetšana le litaba tsena e le ho fa sechaba tšepo.

O re Naha ea Lesotho e fetisa khakanyo ena ea lichelete nakong eo moruo o tetemang, kaha ho tloha selemong sa lichelete sa 2023/24 moruo o theohile ka 2%, sekhahla sa lithe-

ko se nyolohile ka 5% ha bahlanka ba nyolletsoe ka 2%. O re ba pusong ba tlameha ho sebetsa bosiu le motšoare ho bona hore maemo ana a fetoha.

Mokhothu o bontšitse hore likhakanyo tsena tsa lichelete li tlameha ho ntlafatsa boikemelo le boipuso ba Naha ea Lesotho, 'me e tsepame holima tlhahiso e se ke ea fetoha 'maraka oa linaha tse ling. A re naha e atetsoe ke lipolao, lithekefeto le bofuma, tse lokelang ho ea moriting. A re Litsi tsa Tšireletso li tlameha ho tsoa lipolotiking li shebane le mosebetsi oa tsona oa polokeho ea sechaba.

O kokota pelong ea 'muso hore ho phatlalatsoe litaba tsa lipolao e le koluoa kahar'a naha, e le hore baetapele bohle ba sechaba ba fetoloe karolo ea litaba tsena le ho lula ba beoa leseling khafetsa, kaha sena se tla balehisa bo-ramatsete.

A re 'Muso o felise khiri ea sepolotiki le khethollo kaha seo se arola Basotho, bahoebi ba tlohele ho etsa tjela-mahlong 'me Ba-

sotho ba arolelane mesebetsi e lokelang ho etsoa ke sechaba.

Moetapele oa BNP, Machesetsa Mofomobe, o hlalositse hore ba hloholofatsa hore khakanyo ena ea lichelete e fete, le hoja e feta nakong eo naha e leng tlokotsing e kholo ea ntlafatso ea moruo, e tobane le liphephetso tse matla tsa tlhokahalo ea mesebetsi. A re ho lokelela ho sebetsoe phepetso ea bangoli ba baholo ba makala ba ikutloang ba e-na le matla ho feta matona, kaha seo se ama tšebetso ea matona.

A re o ne a khothaletse Tona-Kholo ho nyolla palo ea matona ho tloha ho 15 ho ea ho 20 hore a tsebe ho sebetsa hantle, 'me har'a matona a mang o bontšitse ha Mohlomphehi Lebona Lephema a imelitsoe ka mosebetsi o mongata oa ho alosa makala a mangata.

O re ho bohlokoa hore 'muso o amohele ho soauoa mohlare, o ithute litaba tsa tsamaiso le tšebetso molemong oa tsamaiso e nepahetseng.



# Bophelo ba sechaba bo tlokotsing

## Nthabeleng Seitlheko

**Mokanselara oa Pae la Itlhatsoa 'Mapakalitha Selia o re hlathe e lelekisa tsebe, kaha ba tl'oa hlola lefu la letšollo le lehlato le neng le hlasela baahi, ka lebaka la metsi a sa hloekang. Tsena li hlaheletse puisanong ka mohala le Koranta, ka la 25 Tlhakubele monongoaha.**

O re batho ba ne ba ithusetsa lerallaneng kapa khohloaneng, ba noa metsi a noka ka hoo ho no e-na le lehlato baneng le bathong ba baholo le kholo e sa ntlafalang ea bana. O re esale ba phela ka metsi ao ka nako e telele, ka hona boteng ba matloana le lipompo ho tl'oa sireletsa bophelo ba bona khahlanong le mafu.

O re Setsi sa Bophelo se hole 'me ba qetella ba nka batho ka mampara kaha ba nka lihora tse tšeletseng ho fihla setsing. Ka hona batho ba qetella ba lahlehela ke bophelo ba ntse ba le tseleng, le hore ba bang ba tlohela litlhare tsa bophelo bohle (ARVs) ka lehare le tse ling ka lebaka la bohole.

O bontšitse ha bana ba sa qete liente kaofela hobane ho le thata hore batho ba lule ba ea lienteng, le basali ba hleketsetsoa, hoo ba tlamehang ho felehetsana ho ea Litsing tsa Bophelo. A re bakhachane ba pepela tseleng ka linako tse ling le bo-ntate ba le teng, 'me taba eo e thunthetsa boitšepo ba basali.

O re leha ho e-s'oa be le tahlehela ea bophelo ba mokhachane, empa ba nkoa ka mampara nakong eo motho a tsiet-saneng a eang setsing a il'oa pepa, hoo e bang qholotso ha batho ba le sieo motseng. A re ba bang ba ea setsing ka nako empa qholotso ke hore ba sitoa ho lula sebakeng se joalo ka lebaka la hore b'a iphepa.

O bontšitse ha basebeletsi ba tsa bophelo

motseng e le bona ba rarollang mathata a mangata a tobaneng le sechaba, kaha ba koetlile ba pepisa bakhachane

ka nepo.

H'a itšela ka meekho o itse ba sotlehile kaha Setsi sa Bophelo se le teng empa se hloka baoki. A re

hong ena.

Morena oa Sebaka Mamasiphole Sekonyela, o re sechaba sa habo se tlokotsing kaha ho se na

ka mampara. A re ho boima hobane ba se ba sa ee litsing ka tsela e nepahetseng ho latela boemo bona.

A ipiletsa ho 'muso ho ba etsetsa marokho hore ba tsebe ho tsamaea ha bobebe kaha ho se tsela e 'ngoe ea ho phela le ho tsamaea ntle le ho tšela linoka.

A bontša hore e bang 'muso o sa ba shebe ka mohau ba tla ema ka maoto ho bona hore b'a sireletseha. O re Litsi tsa Bophelo ke tlhoko ea mantlha ea bohle, ka hoo ba ikarabellang ba tlameha ho ba hopola etsoe ba lebaleha.

H'a phethela o re Setsi sa Bophelo se teng ha se na baoki, ba fihla ka ho chakela hobane ba se na bolulo, 'me ho bohlokoa hore molemong oa ho boloka bophelo ba thusoe ba tsebe ho fumana litšebeliso tsa bophelo haufi, etsoe le bana ba tobane le bokakachelana.



maemong a tlokotsi, ba boetse ba thusa batho ka litlhare le ho alosa hore e fela batho ba li sebelisa

ho bohlokoa hore 'muso o ba shebe ka mohau ho latela mathata ao ba tobaneng le eona tikolo-

marokho batho ba nkoa ke metsi, ha bakuli le bona ba felloa ke bophelo ka lebaka la ho nkoa

**BASOTHO FOOD TASTING FESTIVAL**

DATE: 2 - 4 August 2024  
Venue: Boqate Leisure Park

**MORE DETAILS LOADING...**

**SPONSORS:** BOQATE LEISURE PARK, iConnect, National Government of Lesotho

# CBL e khutlisetsa sechabeng

**Tšelisothakholi**

**B**anka e Kholo ea Lesotho (CBL) ka tšebelisanano 'moho le Mokhatlo o thusang Batho ba Tlokotsing (BUA), e entse letsoho la monna ka ho fana ka limpho tsa likoloeana (Wheelchairs) ho bana ba babeli le ntate a le mong ba nang le bokooa ba masapo ka lebaka la ho hlaheloa ke mathata a fapakaneng. Phano ena e bile metseng ea Ha Tso- lo, Mauteng le Ha 'Nelese ka la 26 Ti-



Retšelisitsoe Goodman o hlalositse hore ba tsoile letšolo e le mokhatlo, ho

kopela batho ba hlokanng lithuso mafapheng a fapakaneng a likhoebi le ho batho ka bo-mong. A re ha ba ntse ba potoloha le metse le metsana ho abela ba hlokanng tse ling tsa likoloeana, ba ile ba fumana likopo tsa bana ba bararo ba abetsoeng limpho.

“Re ile ra ba kopela lithuso re le mokhatlo ho CBL, ‘me re leboha haholo hore ebe e ile ea amohela kopo ea rona ka liatla tse peli, ‘me e ntse tlotla e kholo ho batho bana ba hlokanng le ho sechaba sa metse ena e meraro.” A rialo a bile a hlokomelisa sechaba hore BUA ha e na chelete, empa mosebetsi oa eona oa mantlha ho ba hlokanng, ke ho ba kopela lithuso mekhat-

long e meholo, ‘musong, libankeng le ho bahoebi.

Lebitsong la CBL, Mofumahali Lerato Maieane o qalile pele ka ho leboha BUA haele mona e ile ea ba hopola morerong oa mofuta ona, “hore mohlo-mong eo re ka sebetsang le eena ke CBL, e be CBL ha e bona kopo ena ea e ananela ka tsela e khethileng haholo.” A rialo. A re kahare ho CBL ba na le leano le ba tsamaisang, e leng lona la mesebetsi e kang ena ea ho khutlisetsa sechabeng. A supa hore ka leano lena lintlha tsa bohlokoa tseo ba li shebang ke ho thusa bana likolong hore ba tsebe ho ipabola, paballo ea tikoloho, ho sireletsa

le ho hlokomela lihlokoeng tsa eona.

A re e kholo ka ho fetisisa ke eo ba e tletseng metseng ena e meraro e leng boiketlo ba sechaba, e leng moo CBL e shebang ka leihlo la mohau batho bohle ba nang le bohloki. “Empa haholo-holo re sheba mekhatlo e seng batho ka bo-mong. Ke ka lebaka lena e itseng ha BUA e re atamela ka batho bana ba bararo ra utloa selo sa bona.”

A re ho thusa motho ho tsamaea joaloka ka batho ba bang ho mo fa boitšepo ba hore a ikutloe e le karolo ea batho ba bang. “E tsoe e boetse e le tokelo ea mantlha



**h**akubele monongoaha.

Mabitso a ba abetsoeng limpho tsena ke Abuti Kopano Kabi ea lilemo li 'ne oa Ha Tso- lo, Ausi Mosa Pekecha ea lilemo li 11 oa Mauteng le Monghali Moeletsi Soro oa Ha 'Nelese. Thabo ena ha ea bonahala ho ba amohetseng limpho feela, empa ho batsoali le sechaba ka kakaretso se bileng teng liketsahalong tsena tse tharo.

Moemeli oa Mokhatlo oa BUA e leng ona o sebelitseng ka thata ho kopela ba tlokotsing lithuso ho CBL, Monghali



ea motho.” A ipiletsa ho batho bohle ho kenya letsoho ho thusa batho ba nang le bokooa ba pono, ba kutlo le ba sa atleheng ho tsamaea. A boela a hlokomelisa bohle hore meaho le litšebeliso tseo ho fanoang ka tsona e ke ebe tse amohelang batho bohle ho se khethollo.

Malapa ohle a bileng teng litšebeliso tse- na, a ile a isa liteboho tse khethileng ho CBL le ho BUA ka limpho tsena tseo ba li fumaneng. Ba tšepisa ho li baballa e le hore li tle li tsebe bo sebetse nako e telele.

# Lesotho le fetoha lehoatata-Adontši



## Nthabeleng Seithheko

Lesotho le tobane le qholotso e kholo litabeng tsa lihloholoeng le ho taboha ha naha tse tsoetsoeng ke litlam-

ora o tsa phetoho ea leholimo. Tsena li boletsoe ke Letona la Lekala la-Tikoloho le Paballo ea Makhulo Mohlomphehi Letsema Adontši, 'mokeng oa bo-ralitaba oa la 25 Tlhakubele monongoaha.

O re ba tlameha ho fe-

lisa tlhokahalo ea lijo naha ka bophara, le har'a linaha tse ngata tsa lefatše tse angoeng ke phetoho ea leholimo. O re ba aparetsoe ke bohoatata le kholeho ea mobu tse bakoang ke ho hlobola ha naha, mangope le tahle-

ho ea mobu o manoni oa masimo, makhulo a senyehileng le majoang a ratoang ke liphoofole a se a le sieo, ho boetse ho hlhile le sehala-hala.

O supile hore naha e tobane le qholotso ea metsi a sebelisoang malapeng le masimong, a bakiloeng ke litlamorao tsa boemo ba phetoho ea leholimo le kamoo sechaba sa Basotho se tšoereng lihloholoeng le tikoloho ka bohlasoa ka teng, e leng tšebeliso e mpe ea makhulo le, mekhoabo e sa baballoang 'me sena se beha naha tlokotsing ea ho lahlehela ke mehloli ea metsi le lekeno la chelete.

O re tahleho ea boieane ba tlholeho e tliša bofuma le bofutsana ka ha li ama bophelo ba Basotho, ka hona sechaba le marena ba nke boikarabello ho baballa tikoloho le lihloholoeng.

Adontši o supile hore lekala la habo le thomong ea ho hlokomela tikoloho le lihloholoeng, 'me ba hlokometse bohlokoa ba lipuisano, ka hoo ba tl'o phatlalatsa sethala sa tsena tsa tikoloho le tšebeliso ea eona e nepahetseng molimong oa ntšetsopele ea Basotho.

A re ba tla khokhohanya puo le ho thakelana ka mabela ka litaba tsa tikoloho le tšebeliso ea lihloholoeng, e le ba tle ka tharollo ea melao le melaoana e tsamaisang litaba tsa tikoloho. O re ba tla tla ka

litaba tsa menyetta e teng lefatšeng ho ntlafatsa tikoloho.

Are re le naha re nakong eo re ketekelang lilemo tse 200 Morena Moshoeshe l a thehile sechaba sa Basotho, 'me mohoo oa bona ke hore sekoee Basotho, bohle ba tsosolose.

Hosa le joalo, Moetapele oa BNP, Machesetsa Mofomobe tulong ea paramente ea la 25 Tlhakubele monongoaha, o ipilelitse ho 'Muso oa Lesotho ho khutlisa letsatsi la naha la temo ea lifate, mafapha ohle a tsoe ka makhalo ho lema lifate hore naha e apare molemong oa ho hlola maemo a phetoho ea leholimo a amang bophelo ba sechaba.

O re taba ena e tla thusa hore boieane ba tlholeho le kholeho ea mobu li khaotse. A re naha e apere e lokela ho ba boikarabello ba batho bohle eseng ba 'muso ho kenyelletsatsa le likolo. A re naha e lokela ho tla ka mekhoe e ntlafetseng tšireletsehong ea tikoloho.

O itse 'muso o tlameha ho tšoara ka thata ho bona hore lithuto tsa temo e ba tse ntlafetseng likolong, hore bana ba hole ba utloisisa mesebetsi ea boitšematlelo le bohlokoa ba tikoloho e babalahleng, ho seng joalo naha e tla lahlehela le ke matlotlo a eona ho latela tsela eo e amehang ka eona ke phetoho ea boemo ba Leholimo.



**MONDAY 01 APRIL 2024**

**TIME: 9:00-1600**

## NATIONAL HEALTH SYMPOSIUM

**'A Stitch in time saves nine'**

**TARGET AUDIENCE : 2000 PERSONS**

**Refreshments to be served**



**Dr. Thabang D. Seotsanyana**  
Naturopathic Practitioner



**Dr. Rakhoboso 'Mats'episo**  
Naturopathic Practitioner

**TICKET - M250 | 10 Seater table M2000**  
**VIP TICKET - M550 | 10 VIP table M5000**

EcoCash | m-pesa

FNB/RMB  
A/C NAME : MED-IQ  
Nutraceuticals  
Account Type : Saving Pocket  
Account Number : 63064771885  
Branch Code : 280061

6272 8732 | 5791 5410

**VENUE : LESOTHO HIGH SCHOOL HALL**

**TOPICS**

- > CANCER > MALE & FEMALE SEXUAL DYSFUNCTIONS
- > DIABETES MELLITUS > CARDIOVASCULAR DISEASES
- > MENTAL HEALTH : DEPRESSION
- > SUBSTANCE ABUSE/DRUG ADDICTION

**QUESTIONS, COMMENTS & ANSWERS' SESSION**

**ACTIVITIES : EXHIBITIONS**

- a) POULTICES & COMPRESSES
- b) LESOTHO INDIGENOUS BOTANY/HERBS


**SPONSORS**

YOUR COMPANY LOGO HERE



YOUR COMPANY LOGO HERE





# TSA KEREKE

## Rabalumeli o fana ka molaetsa



**Staff**

**M**opapa Francis molaetseng oa hae oa Paseka, oo a ngoletseng Makatholike ohle lefatše ka bophara, Motse-Moholo Rome, Italy ka la 27 Tlhakubele monongoaha o tiisitse 'nete ea hore letsatsi ka leng o ntse a ena le bona menahanong le lithapelong tsa hae.

"Kea le amohela kaofela, ka mefuta eohle ea meetlo ea lona, baratua ba ka ba Makatholike ba tšepahalang, ba phelang lefatšeng ka bophara le Naheng e Halalelang." O boletse joalo a bile a eketsa ka hore ka tsela e khethehileng o amohela bohle ba angoeng haholo ke litlokotsi tse bohloko tsa lintoa, bana ba hlorisoang le ho lahlehela ke bokamoso ba bona, batho ba hlomohileng, ba mahlomoleng le bohle ba iphumanang ba fetohile liphofu tsa mahlomola le litsietsi.

H'a tsoelapele ka molaetsa oa hae oa Paseka, o supile hore o hlokometse bohlokoa bo khethehileng ba Paseka ho ba phelang libakeng tse halalelitsong ke bophelo, lefu le tsoho ea Morena oa rona Jesu Kriste. A thoholetsa le ho ananela taba-tabelo ea bakriste ea ho lula linaheng tseo ba phetseng ho tsona ka lilemo tse makholo-khoho. A ba tiisetse hore ho molimo hore ba lule naheng tseo, 'me a ba leboha ka tumelo, lerato le tšepo ea bona.

A hopola tsa leeto la hae ka selemo sa 2014, moo a ileng a pheta mantsoe a Mohalaleli Paul VI ea neng a hlokomelisi sechaba sa bakriste esale pele, ka tlhokahalo ea khotso, tšireletso le likhohlano tse ntseng li tsoelapele linaheng tsa Bochabela bo Mahareng.

Rabalumeli a totobatsa ka tsela e hlakileng ho bakriste ba phelang linaheng tseo, hore ka bophelo ba bona ba lokela ho baballa libaka tsa bolumeli ba bona ka bosafe-

leng, ho isa sephiring sa mahlohonolo a Morena "Ka matla a lona a ho tsoha bocha le hatele pele le ho tsoelapele ho bolela hore Morena ea thakhisitsoeng o tsohile bafung.

A ba tiisetse hore ha ba bang ba maqakabetsing ao ba leng kahar'a ona a lintoa le mefere-fere e sa eng moriting, empa Kereke e ka Lefatše lohle e tla bontša bonngoe ka thapelo le lerato. Kamor'a ho leboha babishopo le baprista ka mosebetsi oo ba ntseng ba o etsa sechabeng sa Morena Molimo, a qetella molaetsa oa hae ka ho kopa Makatholike ohle ho ipeha tlasa tšireletso ea Maria Movirigo.

**-Vatican News-**

**KRISTE O TSOHILE BAFUNG!! ALLELUIA, ALLELUIA, ALLELUIA**

**2023-2024 SELEMO B**

**MOKETE OA PASEKA**

Liketso 10,34.37-43

Pesalema 117

Ba-Korinthe 5,6-8

Joannes 20,1-9



**Khothatso**



**Jesu ke Morena oa bohle**

Molaetsa oa kajeno ho tsoa Thutong ea Pele (Liketso 10:34, 37-43) o buoa ke Mopapa oa Pele, e leng Peterosi. Hangata batho ha ba mo nke e le Mopapa oa pele empa ha e le kanete ke eena ea amohetseng linotlolo tsa 'Muso oa Morena ka hona ke eena Mopapa oa Pele oa Kereke e Katholike. Joaloka moetapele oa Kereke ea Jesu Kriste o ile a nka setulo sa hae sa boetapele eaba o bua le bohle ba neng ba phuthetse tlung ea Cornelius.

O re ho bona ba tseba molaetsa oa Morena o rometsoeng batho ba Israele, o rutang khotso ea Kriste eo e leng Morena oa bohle. Ka lilemo-lemo sechaba sa Morena se ne se emetse Messia ea neng a tla tlisa khotso lefatšeng ka ho boelanya motho le Molimo. Peterosi o netefatsa hore sena se phethahetse ka Jesu Kriste, Morena oa bohle. Morena Molimo o phethahalitse litšepiso tsa hae tse hlahang Testamenteng ea Khale.

Peterosi o boela a netefatsa hore eena le barutuo ba Morena ke lipaki tsa tsohle tseo Kriste a li entseng Judea le Jerusalem, ka hona ba tseba hore tse builoeng ka Kriste ha se mafofisa ke 'nete hobane bona ba phetse le eena. O boela o ba bolella hore ke 'nete Kriste o ile a thakhisoa, a shoa sefapanong empa Morena a mo tsosa kamor'a matsatsi a mararo. Kamor'a tsoho ea hae o ile a ilthahisa ho barutuo ba khethiloeng ke Morena Molimo ho ba lipaki. Ho hakanngoa hore Kriste o ile a ilthahisa ho batho ba 500 ba fapakaneng kamor'a tsoho ea hae.

Bopaki ba hore e ne feela e le eena e se moea kapa toro o ile a ja a noa le bona, e leng seo moea/sethotsela se ke keng sa li etsa. O ile a ba fa taelo ea hore ba rute bohle 'me ba netefatse hore ke Eena ea romiloeng ke Molimo Ntate ho tla ahlola ba phelang le ba shoeleng. O phethela ka hore baprofeta ba Testamente ea Khale ba buile ka ho tla ha Kriste, 'me ba bolela hore bohle ba tla lumela ho Eena ba tla tsoareloa libe ka Lebitso le Halalelang la Hae.

Ho latela Thuto ea Bobeli (Ba-Kolose 3:1-4) haeba le feela le tsoisitsoe le Kriste le lokela ho batla lintho tse tsoang holimo moo Kriste a lulang teng. Tsepamisang maikutlo a lona holima tsohle tsa moea e se tsa lefatše. Ka ho tsoaloe la bobeli ka tlhatsuo le tlangoa ho fepa meea ea lona ka tse lokelang. Holisang makhabaneng ohle a moea, behang litholoana tsa Moea o Halalelang e le hore le tle le fetoloe hanyane ka hanyane ka grasia ea Morena, ebe le fetoha ba tsoanang le Mor'a Molimo.

Evangeling (Joannes 10:1-18) Maria o ne a hloka Jesu ke ka hona a ileng a lla ha fumana 'mele oa hae o le sieo. O ile a nahana hore mohlomong ho na le motho ea mo nkileng; o na lilela ho ba le Kriste, ho mo latela, ho utloa mantsoe a hae, ho fumana lerato, ho utloisisoa le ho tsoareloa libe. E ne e se eena feela ea nang le maikutlo a na, ke ka hona barutuo ba hae ba ileng ba makala ha ba utloa hore Kriste ha sa le eo lebitleng, O tsohile.

Ha ba utloile hore Kriste o tsohile ba ile ba boela ba fumana thabo e neng e ba lahlehetsa ka lebaka la lefu la hae. Tšepo e ile ea khutla 'moho le tumelo e ileng ea matlafatsa ke ho hopola mantsoe a Hae ha le lefatšeng. Ke thato ea Morena hore re fete maemong a Maria e le hore re lule re lakatsa ho ba le Kriste kamehla.

Ak'u nahane ka motsotso oo o neng o hloka Kriste bophelong ba hao, tsosa moea oa hao ho phela nakong eo. E se letsatsing lena feela kapa a mabeli a tlang empa ka bophelo bohle ba hao hofihlela Morena a ilthahisa ho uena.

**Bahalaleli har'a Beke**

- 1 'Mesa Hugh oa Grenoble
- 3 'Mesa Francis oa Paola
- 3 'Mesa Fara
- 4 'Mesa Plato
- 5 'Mesa Vincent Ferrer
- 6 'Mesa Elstan

# Rugby Academy e teteka Liqhomane



## Tšeliso Thakholi

Sehlopha sa papali ea Rugby seo e saleng se ipabola ka papali ea sona e tsoileng matsoho, ho tloha ha Liki ea Rugby e qala monongoaha, sa Lesotho Rugby Academy se ile sa tlontlolla le ho hobosa sa Liqhomane ka ho se teteka ntle le qenehelo ka phafa ea 31-21, papaling ea liki e neng e bapalloa Lebaleng la Oblate Scholasticate, Roma, ka la 23 Tlhakubele monongoaha.

Hona ho bolela hore Lesotho Rugby Academy e ntseng e li hula pele lokong, e boetse e butse kheea e kholo lipakeng tsa eona le Liqhomane e hlahang maemong a bobeli, kaha e na le lintlha-khola tse 19, 'me e siea Liqhomane ka tse 14

kaofela kamor'a ho bapala lipapali tse 'ne.

Moetapele oa Lesotho Rugby Academy, Alex Ncheke o bontšitse a thabile haholo ke tlhola ena, kaha e ntse e ba matlafatsa haholo maemong a loko. A supa hore Liqhomane e ne eba qholotsa hore ba bapele ka bohlasoa ba tsebe ho etsa liphoso tse ngata tse ka qetellang li ba ntšitse mokola. Leha ho le joalo, a bontša hore ba ile ba qoba ho oela sefing seo sa bona.

Haele mokoetlisi oa Liqhomane, Monghali Kubutu Makhakhe o itse leha ba lahlehetsoe ke papali ena, o motlotlo haholo ke tsela eo sehlopha sa habo se bapetseng ka teng, kaha se bapetse ho latela boitlhopho ba sona, empa seo a se

boneng ke hore ba ile ba batla ba hloleha ho tsepamisa mai-

kutlo a bona papaling, ka lebaka la mokhathala o neng o se o bonahala o iphile matla.

A re le ha ho le joalo haele mokhoa oa ho hlasela le ho sireletsa, o thabile haholo hoba ke lintho tseo ba li entseng papaling ena. "Lihlopha tsena tse peli lia tsebana kaha ho na le libapali tse neng li bapalla Liqhomane, 'me joale ba se ba bapalla Lesotho Rugby Academy. Joale sena se ile sa etsa hore moea e be o matla haholo kaha ho ne ho se sehlopha se ba tlang hore se hloloe ke se seng." A rialo.

A re sena se ile sa phahamisana moea oa papali hona hoo libapali li neng li tsamaea li shobana ka jesi nakong ea papali.

"O tsebe hangata papaling ea rugby ha libapali li se li ntse li shobana, papali eno ke e monate ka ho fetisisa." O boletse joalo. A re ho ea pele seo a ka se buang ke hore joang kapa jang, ba tli'o hapa Liki ena ha lipapali li fela. "E sa le mokhahlelong oa pele, 'me ho na le bahlankana ba bacha bao re ntseng re ba kenya, re batla ho bona hore na re lokisa kae le ho fokotsa ho kae hobane re bile le likotsi tse ngata haholo. Joale re ntse re kenya ba bacha hore ba tle ba fihlele maemo a rona a pele." A rialo a bile a phethela ka hore ba na le libapali tse ngata tse ncha, tse tli'o thusa sehlopha ho hapa Liki.



# Lihlopha tsa Basketball li'a tjekana

## Tšeliso Thakholi

Tang-tang e ile ea khangoa ke lerole mabaleng a Sekolo se Seholo sa Sechaba(NUL), Roma, ka la 23 Tlhakubele monongoaha nakong eo lihlopha tse khola tsa papali ea Basketball li neng li tjekana, lekhetlo la pele litholisanong tsa Mohope oa Liki, kamor'a ho emisoa nako e telele.

Lihlopha tse neng li qothisa-

na lehlokoa, ho basali ke Lerotholi, BKMS, NUL Ladies le Bokamoso Dolphines. Mokhahlelong oa A ka ho banna ke Lerotholi, Simply Talent, KTA All Stars le BKMS Rebels. Mokhahlelong oa B ke BKMS Alumini, Razzmatazz, Shooting Rifles le NUL. Moo teng BKMS Rebels e ileng ea pshatlaka Sehlopha sa KTA ka lintlha tse 51-43. Athe BKMS Alumini e ile ea teteka Razzmatazz ka lintlha tse 68-47. Haele Bokamoso



Dolphines eona e ile ea ruthaka NUL Ladies ka 35-26.

Sehlopha sa Bokamoso Dolphines se ile sa hla sa bapala hantle, kaha se ile sa ipabola haholo ka ho hlaba lintlha nakong eo papali ea sona le NUL Ladies e neng e sa tsoa qala. Haele lipapali tse ling tse bileng lipakeng tsa Shooting Rifles le NUL le Lerotholi le Simply Talent, tsona ha lia ka tsa bapala ka lebaka la maemo a leholimo.

Ho ea ka e mong oa bakoetlisi ba lihlopha tsa papali ea Basketball, Monghali Mofihli Keketsi, o re bosieo ba Liki ea Basketball nako e telele bo ile ba otlala lihlopha tsa bona maling a mpa habohlolo, hoo bohola ba tse ling tsa tsona li ile tsa qhaloa, empa e itse ha li utloa khoehetso ea hore liki e khutlile li boetse li tsohile morolo 'me li khutlile ka bongata bo bohola.

"Taba ena ea hore liki e khut-

lile e re file matla, 'me re bona lihlopha tsa rona li bapala ka boitelo bo bohola." O boletse joalo a bile a bontša hore sehlopha sa habo sa NUL Ladies le sa bahlankana, nakong eo liki e neng e ntse e emisitse ka lebaka la mathata a ileng a hlaha, ba ne ba sa phomola empa ba bile le lehlohonolo la hore lihlopha tsa bona li ne li bapala lipapali tsa Basketball boemong ba likolo tse khola, 'me taba ena e thusitse libapali tsa bona haholo hore ha liki e qala ba 'ne ba be le matla le maqiti a papali ena. A bontša hore ba ikutloa ba le motlotlo haholo hore e be lipapali tsa liki li boetse li khutlile.

H'a bua ka papali eo ba e bapetseng, o itse leha ba lahlehetsoe ke papali eo ka 35-26 ka lehlakoreng la basali, o bone basali ba bapetseng ka boitelo bo bohola ba bile ba tsebang melao ea papali, kaha bohola ba sehlopha seo e le se secha. A tiisa hore sehlopha se hlahlamang seo ba tli'o kopana le sona, se tli'o kopana le pela li falla.



**Tšelisothakholi**

Selemo se secha sa litlholisano tsa Liki ea Volleyball se qalile mafelong ana a fetileng a beke, 'me Mokhatlo oa Naha o Tsamaisang Papali ea Volleyball(LVA), o ile oa tšoara litlholisano tsa pele tsa lihlopha tsa Liki e Kholo ea A Division tse bulang selemo ka Sekolong se Seholo sa Sechaba(NUL), Roma, ka la 23 Tlhakubele monongoaha.

Lihlopha tsena li arotsoe ka mekhahlelo e 'meli, e leng tse robeli tsa bahlankana le tse robeli tsa baroetsana, 'me li bapala liki ka mokhoa oa litlholisano ka mekhahlelo e mene, ho fihlela qetellong

# LVA e bula selemo se secha

ha Liki e fela eba ho khethoa lihlopha tseo e le bompoli mahlakoreng a mabeli, eba tsona tse tlang ho emela naha lipapaling tsa machaba tsa Mohope oa CAVB Zone Six Championship, tseo monongoaha li tlii'o tšoareloa Gaborone Naheng ea Botswana ka Tšitoe.

Puisanong le Motlatsi oa President ea LVA litabeng tsa koetliso, Monghali Eric Tšoeu, o supile hore qholotso e kholo eo ba tobaneng le eona monongoaha ke tlhokahalo ea lichelete. "Re qalile lipapali tsena re se na letho ho hang, re tsamaisa



lipapali ka liabo tsa litho. Re se re etsa boipiletso ho bafani le ho batho bohle ba boithatelo bo botle ho etsa letsoho la monna." A rialo.

Tšoeu o supile hore lichelete tseo ba neng ba li fuoe ke LSRC ba ile ba li sebelisa, nakong eo ba neng ba tšoare litlholisano tse kholo tsa pele tsa mofuta oa tsona, tsa machaba tse bitsoang Beach Volleyball ka Tšitoe ngoahola, moo ba ileng ba sebelisa chelete e ngata. "Ra boela ra tšoara sa Zine Six Championship tse ileng tsa atleha haholo. Ka hona re se re etsa thapeli ho batho bohle ho tšehetsa liki ena ea rona ea monongoaha." A rialo.

A re ke hona nakong eo ea litlholisano tse tsoa feta ba

ileng ba ithuta tsamaiso ea lipapali tsa Volleyball, eo ba tlii'o leka ka hohle ho e kenya tšebetsong e le hore Basotho ba tle ba tsebe ho bona lipapali tse ntlafetseng tsa Volleyball kahar'a naha. A re ba boetse ba ithutile hore ho bapala bana ba ntseng ba le banyenyane lilemong, linaheng ka ho fapakana ha tsona. A re ba tlii'o nka mokhoa ona o mocha ho matlafatsa Liki ea Mokhahlelo o ka tlaase ea B Division, e leng hona moo ba ntseng ba otlala moloko o mocha o tlang ho bapala papali ea Volleyball. A phethela ka hore monongoaha ke lihlopha tse peli tsa banna tse keneng Liki e Kholo e leng Platoon le Lerotholi ha ka ho basali e le Abia Tigers feela.

## Li ngangane ntoeng ea Top 4

**Tšelisothakholi**

Le hoja ho setse papali e le 'ngoe pele lihlopha tsa Mokhahlelo oa A Division li phethela lipapali tsa tsona, ho bonahala ho sa le lerootho hore na ke sefe sehlopha sa ka Leboea lipakeng tsa O5 United le Swallows, se tla atleha ho ba kahara tse 'ne tse ka holimo lokong ha liki e fela.

Lihlopha tsena ka bobeli ntoa e sale matla lipakeng tsa tsona, kaha lipapali tsa tsona tsa ho qetela li tla supa hore na ke sefe sehlopha se tla kena ho tse 'ne, tse tlang ho kopana le tse 'ne tsa ka Boroa ho bapala Mohope oa Top 8. Sena se bakiloe ke hore mafelong ana a beke O5 United e bapale ka ho lekana ka seahlolo sa 2-2 le Members, ha Swallows le eona e bapetse ka 1-1 le FC Summit.

Puisanong le Mokoetlisi oa O5 United, Monghali Tio Molupe o supile hore ho ba-

pala ka ho lekana le sehlopha sa Members ke tlotla e kholo, kaha ba sa lahlehelo ka papali ha ba etile. Le hoja morero e ne e le ho hapa papali eo, e le ho ipeha monyetleng oa ho ba kahar'a tse 'ne tse ka holimo. "Morero oa ka ho tloha sethathong ha liki e qala, kaha re ne re qala ho kena lihlopheng tsa

A Division e ne e le ho sebeletsa hore re se ke ra tsoa, 'me Top 4 ke bonus." A rialo.

Are kahare ho A division ha ho ts'oane le ho bapala B Division, kaha a ithutile hore koano papali eo sehlopha se e bapalang e tšoana hantle le eo ba e bapalang ho makhaola-khang. "E batla e le liki e boima haholo,

e hlohang libapali tse matla." O boletse joalo. A supa hore nthla e 'ngoe e ileng ea batla e thefula sehlopha hore se qetelle se le tlasa khatello e matla ea hore se kene kahare ho Top 4, ke ho se shebele 'moho ha botsamaisi ba sehlopha nakong eo se neng se sebetsa hantle, 'me sena se ile sa batla se ama

tšebetso ea sona.

"Re qalile hantle ha selemo se qala, empa ra kula ka hloohong ke boemo bo ileng ba eba teng. Ke ka lebaka lena re ileng ra lahlehelo ka lipapali tse ngata." A rialo a bile a eketsa ka hore kamor'a hore litaba tsena li ee moriting, sehlopha se boetse se kopane hantle, 'me se atlehile le ho baleha ho rathoa ke selepe. Ka hona se se se loanela ho kena kahar'a Top 4. A tiisa hore monyetla o ntse o le teng oa hore ba ka kena kahare ho litlholisano tsa Top 8, ha lipapali tsa liki li fihla pheletsong mafelong ana a beke.

Ho sa le joalo, sehlopha sa Majantja se shapile sa Qacha's Nek LMPS ka thupa ea 6-0, 'me ke sona se li hulang pele Liking ea A Division ka Leboea ka 41 points, bobeling ke Qoaling Highlanders ka 33 points, borarong ke Members ka 29 points ha boneng e le Swallows ka 28 points, e tlii'o tsekisana lipapaling tsa ho qetela le O5 United e nang le 25 points.

